

গণপ্রজাতন্ত্রী বাংলাদেশ সরকার
তথ্য অধিদফতর
বাংলাদেশ সচিবালয়
ঢাকা

সংবাদ গতিধারা

জাতীয় দৈনিকসমূহে প্রকাশিত সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ০৯/২০১৭-১৮

ঢাকা, বুধবার ১২ জুলাই ২০১৭, ২৮ আষাঢ় ১৪২৪

আজকের দৈনিক পত্রিকাগুলো নিম্নলিখিত বিষয় প্রাধান্য দিয়ে খবর ছেপেছে :

- ১। চট্টগ্রামে এলিভেটেড এক্সপ্রেসওয়ে নির্মাণসহ ৯ প্রকল্প একনেকে অনুমোদন
- ২। ভারতে তীর্থযাত্রীদের ওপর হামলার নিন্দা প্রধানমন্ত্রীর
- ৩। চিকুনগুনিয়া নিয়ে আতঙ্কিত হওয়ার কিছু নেই : স্বাস্থ্যমন্ত্রী
- ৪। এসডিজি অর্জনে বাণিজ্য বাধা দূর করতে হবে : জেনেভায় বাণিজ্যমন্ত্রী
- ৫। সুইস ব্যাংকে টাকা পাচার সংক্রান্ত ভিত্তিহীন খবরে জনমনে
বিশ্রান্তি দূর করতে সংসদে অর্থমন্ত্রীর বিবৃতি
- ৬। দেশের ৮৭ ভাগ মানুষ নিরাপদ পানি পায় : সংসদে স্থানীয় সরকার মন্ত্রী
- ৭। তুলা আমদানি হয়েছে চাহিদার ৯৭ শতাংশ : সংসদে কৃষিমন্ত্রী
- ৮। প্রতি উপজেলায় মিনি স্টেডিয়াম করা হবে : সংসদে ক্রীড়া প্রতিমন্ত্রী
- ৯। বিমান চালনায় বাধা সৃষ্টি করলে মৃত্যুদণ্ড : সংসদে বিল পাস
- ১০। এলাকাভিত্তিক গাড়ি নিয়ন্ত্রণে ক্ষমতা পেল বিআরটিএ : সংসদে বিল পাস
- ১১। আরও ৫৮ শব্দসৈনিককে মুক্তিযোদ্ধার স্বীকৃতিস্বরূপ প্রজ্ঞাপন জারি

১। চট্টগ্রামে এলিভেটেড এক্সপ্রেসওয়ে নির্মাণসহ ৯ প্রকল্প একনেকে অনুমোদন

চট্টগ্রাম শহরের লালখান বাজার হতে শাহ আমানত বিমানবন্দর পর্যন্ত এলিভেটেড এক্সপ্রেসওয়ে নির্মাণসহ ৯ প্রকল্প অনুমোদন দিয়েছে জাতীয় অর্থনৈতিক পরিষদের নির্বাহী কমিটি (একনেক)। এগুলো বাস্তবায়নে মোট ব্যয় ধরা হয়েছে ৬ হাজার ৩৯৩ কোটি ১৮ লাখ টাকা। এর মধ্যে সরকারি তহবিল থেকে ৫ হাজার ৯০০ কোটি টাকা, বাস্তবায়নকারী সংস্থা থেকে ৫৭ কোটি ৩ লাখ টাকা এবং বৈদেশিক সহায়তা থেকে ৪৩০ কোটি ৪২ লাখ টাকা ব্যয় করা হবে। গতকাল ১১ জুলাই মঙ্গলবার রাজধানীর শেরে বাংলা নগরের এনইসি সম্মেলন কক্ষে অনুষ্ঠিত বৈঠকে এ অনুমোদন দেওয়া হয়। এতে সভাপতিত্ব করেন প্রধানমন্ত্রী ও একনেক চেয়ারপারসন শেখ হাসিনা। সূত্র-সংবাদ (শেষ পৃ.,ক.১), সমকাল (পৃ.১৯,ক.২), অবজারভার (পৃ.১৭,ক.১), ইন্ডিপেনডেন্ট (পৃ.১১,ক.২)।

২। ভারতে তীর্থযাত্রীদের ওপর হামলার নিন্দা প্রধানমন্ত্রীর

জম্মু-কাশ্মীরে হিন্দুদের তীর্থক্ষেত্র অমরনাথ যাত্রায় সন্ত্রাসী হামলায় সাত পূণ্যার্থী নিহতের ঘটনায় তীব্র নিন্দা জানিয়েছেন প্রধানমন্ত্রী শেখ হাসিনা। এছাড়া নিহতদের প্রতি শোক ও তাঁদের আত্মার শান্তি কামনা করেছেন তিনি। গতকাল ১১ জুলাই মঙ্গলবার ভারতের প্রধানমন্ত্রী নরেন্দ্র মোদির কাছে পাঠানো এক বার্তায় তিনি এ শোক প্রকাশ করেন। সেইসঙ্গে প্রধানমন্ত্রী উগ্র চরমপন্থার বিরুদ্ধে ভারতের সঙ্গে কাজ করতে অঙ্গীকার পুনর্ব্যক্ত করেছেন। সূত্র-সমকাল (পৃ.১৯,ক.৫), জনকণ্ঠ (শেষ পৃ.,ক.৬), অবজারভার (পৃ.১,ক.১), বাংলাদেশ টুডে (পৃ.৩,ক.৪)।

৩। চিকুনগুনিয়া নিয়ে আতঙ্কিত হওয়ার কিছু নেই : স্বাস্থ্যমন্ত্রী

স্বাস্থ্য ও পরিবার কল্যাণ মন্ত্রী মোহাম্মদ নাসিম চিকুনগুনিয়া নিয়ে আতঙ্কিত না হওয়ার জন্য পরামর্শ দিয়ে বলেছেন, চিকুনগুনিয়া মরণব্যাদি নয়। এটি ভাইরাসজনিত একটি রোগ। কয়েকদিনের চিকিৎসায় এই রোগে আক্রান্ত ব্যক্তি আরোগ্য লাভ করেন। এই রোগ এখন পর্যন্ত মহামারি রূপ ধারণ করেনি। গতকাল ১১ জুলাই মঙ্গলবার রাজধানীর ওসমানী স্মৃতি মিলনায়তনে বিশ্ব জনসংখ্যা দিবস উপলক্ষে আয়োজিত আলোচনা সভায় প্রধান অতিথির বক্তব্যে স্বাস্থ্যমন্ত্রী এ কথা বলেন। সূত্র-ইত্তেফাক (শেষ পৃ.,ক.৫), সমকাল (পৃ.১৯,ক.৮), অবজারভার (পৃ.১,ক.১), ইন্ডিপেনডেন্ট (শেষ পৃ.,ক.২)।

৪। এসডিজি অর্জনে বাণিজ্য বাধা দূর করতে হবে : জেনেভায় বাণিজ্যমন্ত্রী

বাণিজ্যমন্ত্রী তোফায়েল আহমেদ বলেছেন, জাতিসংঘ ঘোষিত টেকসই উন্নয়ন লক্ষ্য (এসডিজি) অর্জনে বিশ্ব বাণিজ্যে প্রতিবন্ধকতা দূর করতে হবে। বাড়াতে হবে বাণিজ্য সক্ষমতা। আর এ জন্য সম্মিলিত পরিকল্পনা নিতে হবে। মন্ত্রী গতকাল ১১ জুলাই মঙ্গলবার সুইজারল্যান্ডের জেনেভায় বিশ্ব বাণিজ্য সংস্থা (ডব্লিউটিও) আয়োজিত বাণিজ্যের জন্য সাহায্য (এইড ফর ট্রেড) বিষয়ে ষষ্ঠ বৈশ্বিক পর্যালোচনার এক কর্ম-অধিবেশনে এসব কথা বলেন। সূত্র-সমকাল (পৃ.১২,ক.৫), সংবাদ (পৃ.১৪,ক.৪), অবজারভার (পৃ.৪,ক.১), ইন্ডিপেনডেন্ট (পৃ.১১,ক.৬)।

৫। সুইস ব্যাংকে টাকা পাচার সংক্রান্ত ভিত্তিহীন খবরে জনমনে

বিভ্রান্তি দূর করতে সংসদে অর্থমন্ত্রীর বিবৃতি

সুইস ব্যাংকে অর্থ পাচার নিয়ে জনমনে সৃষ্ট বিভ্রান্তি দূর করতে অর্থমন্ত্রী আবুল মাল আবদুল মুহিত বলেছেন, বিদেশে যে টাকা পাচার হয় তা যৎসামান্য। এটা নজরে নেওয়ার মতো নয়। সুইস ব্যাংকে টাকা পাচারের বিষয়টি বাস্তবে মোটেই তেমন কিছু নয়। টাকার যে হিসাব গণমাধ্যমে বেরিয়েছে ওইগুলো সুইস ব্যাংকের সঙ্গে এদেশের লেনদেনের হিসাব ও সম্পদের হিসাব। এ নিয়ে দেশে একটা ভুল বোঝাবুঝির সৃষ্টি হচ্ছে। এই বিবৃতিতে তার অবসান হবে। গতকাল ১১ জুলাই মঙ্গলবার সংসদে ৩০০ বিধিতে দেওয়া এক বিবৃতিতে অর্থমন্ত্রী এসব কথা বলেন। সূত্র-ইত্তেফাক (শেষ পৃ.,ক.১), জনকণ্ঠ (পৃ.১,ক.৮), অবজারভার (পৃ.৩,ক.২), নিউ এজ (পৃ.১,ক.৮)।

৬। দেশের ৮৭ ভাগ মানুষ নিরাপদ পানি পায় : সংসদে স্থানীয় সরকার মন্ত্রী

বাংলাদেশে শতকরা ৮৭ভাগ জনগণ নিরাপদ পানির সুবিধার আওতাভুক্ত। অবশিষ্ট ১৩ ভাগ জনগণ দূরবর্তী অন্যান্য নিরাপদ পানির উৎস থেকে খাবার পানি সংগ্রহ করে থাকে। আর বর্তমানে বাংলাদেশে ৯৯ ভাগ

=৩=

জনগণ মৌলিক স্যানিটেশনের আওতাভুক্ত। এর মধ্যে ৬১ ভাগ জনগণ উন্নত ল্যাট্রিন, ২৮ ভাগ জনগণ যৌথ ল্যাট্রিন এবং ১০ ভাগ মানুষ অনুন্নত ল্যাট্রিন ব্যবহার করে। গতকাল ১১ জুলাই মঙ্গলবার জাতীয় সংসদে এক প্রশ্নের জবাবে এ তথ্য জানান স্থানীয় সরকার, পল্লী উন্নয়ন ও সমবায় মন্ত্রী খন্দকার মোশাররফ হোসেন। সূত্র-জনকণ্ঠ (পৃ.২,ক.৮), ইনকিলাব (শেষ পৃ.,ক.৬), অবজারভার (পৃ.৩,ক.২), ইন্ডিপেনডেন্ট (পৃ.৩,ক.১)।

৭। তুলা আমদানি হয়েছে চাহিদার ৯৭ শতাংশ : সংসদে কৃষিমন্ত্রী

২০১৬-১৭ অর্থবছরে তৈরি পোশাক শিল্পের চাহিদা পূরণে প্রায় ৪৫ লাখ বেইল ফাইবার তুলা আমদানি হয়েছে। পাশাপাশি সদ্যসমাপ্ত অর্থবছরে দেশে ১ লাখ ৬০ হাজার বেইল ফাইবার তুলা উৎপাদিত হয়েছে, যা তৈরি পোশাক শিল্পে তুলার মোট চাহিদার প্রায় ৩ শতাংশ। অর্থাৎ চাহিদার বাকি ৯৭ শতাংশ তুলাই আমদানি করা হয়েছে। গতকাল ১১ জুলাই মঙ্গলবার জাতীয় সংসদে কৃষিমন্ত্রী বেগম মতিয়া চৌধুরী এসব তথ্য তুলে ধরেন। সূত্র-ভোরের কাগজ (পৃ.৯,ক.২)।

৮। প্রতি উপজেলায় মিনি স্টেডিয়াম করা হবে : সংসদে ক্রীড়া প্রতিমন্ত্রী

দেশের প্রতিটি উপজেলায় একটি করে মিনি স্টেডিয়াম নির্মাণ করার পরিকল্পনা নিয়েছে সরকার। সারাদেশে ৪৯০টি মিনি স্টেডিয়াম নির্মাণ করা হবে। ইতোমধ্যে ১৩১টি মিনি স্টেডিয়াম নির্মাণের টেন্ডার ও ওয়ার্ক অর্ডার হয়েছে। ৩ একর জমি নিশ্চিত হলেই মিনি স্টেডিয়াম করা হবে। গতকাল ১১ জুলাই মঙ্গলবার জাতীয় সংসদে এক প্রশ্নের জবাবে যুব ও ক্রীড়া প্রতিমন্ত্রী ড. বীরেন শিকদার এ তথ্য জানান। সূত্র-জনকণ্ঠ (শেষ পৃ.,ক.১), ভোরের কাগজ (পৃ.৫,ক.৫)।

৯। বিমান চালনায় বাধা সৃষ্টি করলে মৃত্যুদণ্ড : সংসদে বিল পাস

বিমান চালনায় বাধা সৃষ্টি করে মানুষের জীবন ঝুঁকিতে ফেললে মৃত্যুদণ্ডের পাশাপাশি পাঁচ কোটি টাকা জরিমানার বিধান রেখে ‘বেসামরিক বিমান চলাচল বিল-২০১৭’ সংসদে পাস হয়েছে। গতকাল ১১ জুলাই মঙ্গলবার সংসদের বৈঠকে বিলটি পাসের জন্য উত্থাপন করেন বিমানমন্ত্রী রাশেদ খান মেনন। পরে সেটি কণ্ঠভাটে পাস হয়। সূত্র-সমকাল (পৃ.৪,ক.৩), জনকণ্ঠ (পৃ.২,ক.১), যুগান্তর (পৃ.১৭,ক.৫)।

১০। এলাকাভিত্তিক গাড়ি নিয়ন্ত্রণের ক্ষমতা পেল বিআরটিএ : সংসদে বিল পাস

যানজট নিরসনে এলাকাভিত্তিক মোটরযান ও গণপরিবহণের সংখ্যা নির্ধারণ ও নিয়ন্ত্রণে বিআরটিএকে ক্ষমতা দিয়ে সংসদে ‘বাংলাদেশ সড়ক পরিবহণ কর্তৃপক্ষ বিল-২০১৭’ পাস হয়েছে। গতকাল ১১ জুলাই মঙ্গলবার সংসদে বিলটি পাসের জন্য উত্থাপন করেন সড়ক পরিবহণ ও সেতুমন্ত্রী ওবায়দুল কাদের। পরে এটি কণ্ঠভাটে পাস হয়। সূত্র-সমকাল (পৃ.২,ক.১), যুগান্তর (পৃ.১৭,ক.৫)।

১১। আরও ৫৮ শব্দসৈনিককে মুক্তিযোদ্ধার স্বীকৃতিস্বরূপ প্রজ্ঞাপন জারি

স্বাধীন বাংলা বেতার কেন্দ্রের অনুষ্ঠান ‘চরমপত্র’র উপস্থাপক এম আর আখতার মুকুল, চলচ্চিত্রকার সুভাষ দত্ত, কণ্ঠশিল্পী তিমির নন্দী, ফকির আলমগীরসহ মুক্তিযুদ্ধে অবদান রাখা আরও ৫৮ জন শব্দসৈনিককে মুক্তিযোদ্ধার স্বীকৃতি দিয়েছে সরকার। জাতীয় মুক্তিযোদ্ধা কাউন্সিলের (জামুকা) ৪৪তম সভার সিদ্ধান্ত অনুযায়ী গত ১০ জুলাই সোমবার এই শব্দসৈনিকদের মুক্তিযোদ্ধার স্বীকৃতি দিয়ে প্রজ্ঞাপন জারি করা হয়। এর আগে গত বছরের ১৫ নভেম্বর প্রথম দফায় ১০৮ জন শব্দসৈনিককে মুক্তিযোদ্ধার স্বীকৃতি দিয়ে প্রজ্ঞাপন জারি করে মুক্তিযুদ্ধ বিষয়ক মন্ত্রণালয়। সূত্র-

সমকাল (পৃ.২,ক.৭), সংবাদ (শেষ পৃ.,ক.৬), বাংলাদেশ টুডে (পৃ.১,ক.৪), অবজারভার (পৃ.৪,ক.২)।

সম্পাদকীয়

- ক. **ইত্তেফাক** : ময়মনসিংহের মুক্তাগাছা শহরে ময়মনসিংহ-টাঙ্গাইল মহাসড়ক দখল করে একটি অবৈধ বাস টার্মিনাল স্থাপন করা হয়েছে উল্লেখ করে সারা দেশেই সড়ক-মহাসড়কের ওপর নির্মিত এমন অসংখ্য অবৈধ বাস টার্মিনাল ও স্থাপনা অপসারণে কার্যকর পদক্ষেপ নেওয়ার সুপারিশ।
- খ. **সংবাদ** : একাদশ শ্রেণীতে ভর্তি হওয়া প্রায় সাড়ে ১২ লাখ শিক্ষার্থীর জন্য খোলাবাজারে সরকার নির্ধারিত মূল্যে বিক্রির লক্ষ্যে প্রতি বিষয়ের জন্য বই ছাপানোর অনুমোদন দেওয়া হয়েছে মাত্র ছয় লাখ কপি যার ফলে প্রায় অর্ধেক শিক্ষার্থী সরকার অনুমোদিত বই পাবেনা উল্লেখ করে যেকোনো মূল্যে সব শিক্ষার্থীদেরহাতে সহজে সুলভে মানসম্মত বই পৌঁছে দেওয়ার ওপর গুরুত্বারোপ।
- গ. **সমকাল, সংবাদ, ভোরের কাগজ, যুগান্তর, ডেইলি স্টার, ডেইলি সান** : জাতীয় সংসদে অর্থমন্ত্রী শীর্ষ ১০০ ঋণ খেলাপির তালিকা প্রকাশ করায় সাধুবাদ জানিয়ে তাদের বিরুদ্ধে যথাযথ পদক্ষেপ নেওয়া হবে বলে প্রত্যাশা ব্যক্ত।
- ঘ. **ইনকিলাব** : দেশের মানবসম্পদকে দক্ষ করে গড়ে তুলতে শিক্ষাব্যবস্থার গুণগত মানোন্নয়নের ওপর গুরুত্বারোপ।
- ঙ. **যায়যায়দিন** : সকল কলেজগুলোতে আইসিটি বিষয় বাধ্যতামূলক করা হলেও শিক্ষক সংকট থাকায় উদ্বিগ্ন প্রকাশ করে এ সংকট নিরসনে যথাযথ উদ্যোগ নেওয়ার সুপারিশ।
- চ. **ইন্ডিপেনডেন্ট** : বরিশাল সিটি করপোরেশনের ২৬১ পয়েন্টে স্থাপিত সিসিটিভিগুলো অধিকাংশ অকার্যকর হয়ে পড়ায় এগুলোসহ রাজধানীর নষ্ট হয়ে যাওয়া সিসিটিভিগুলো দ্রুত মেরামত করার আহ্বান।
- ছ. **ডেইলি সান** : দেশের ১১ শতাংশ নারী জন্মনিয়ন্ত্রণ পদ্ধতির কার্যক্রমের বাইরে থাকায় এ জনগোষ্ঠীকে এ পদ্ধতির অধীনে আনতে সরকারকে বেশ কিছু মেকানিজম গ্রহণের সুপারিশ।
- জ. **নিউ নেশন** : ভারতের ফারাক্কা ও গজলডোবা বাঁধের ৫৪টি স্লুইস গেট খুলে দেওয়ায় রাতারাতি বাংলাদেশের লালমনিরহাট, রংপুর, নীলফামারি, কুড়িগ্রাম ও জামালপুর জেলায় বন্যা পরিস্থিতির অবনতি হওয়ার বিষয় তুলে ধরে সম্পাদকীয় প্রকাশ।

নিবন্ধন ও ফিচার

ভোরের কাগজ পত্রিকায় প্রকাশিত ‘যানজট ও জলাবদ্ধতার সমাধানে সমন্বিত পদক্ষেপ দরকার’ শিরোনামের নিবন্ধে অভিমত প্রকাশ করা হয়েছে, রাজধানীর জলাবদ্ধতা ও যানজট নিরসনে সরকার ও সিটি করপোরেশন কর্তৃপক্ষকে সমন্বিত উদ্যোগ গ্রহণ করতে হবে।

#

ডালিয়া/ফাহিমা/শুকলা/মরজিনা/সাইদা/রশীদ/তানিয়া/২০১৭/৯.০০ঘন্টা

